



UPA 2017/053-01

22-05-2017

**UPA 2018-imi saqqummiunneqartussamik utoqqalinersiallit siusinaartumillu
sulisinnaajunnaarnersiutillit saniatigut sulisarnerminni pisartakkaminnik
ilanngaaffigitittarunnaarnissaata kinguneqaataanik Naalakkersuisut misissuinissamik
peqquneqarnissaat pillugu Inatsisartut aalajangiiffissaattut siunnersuut.**

(Inatsisartunut ilaasortaq Villy Olsvig, Inuit Ataqatigiit)

Inatsisartunut ilaasortap Villy Olsvig, Inuit Ataqatigiinneersup UPA 2018-imi saqqummiunneqartussamik utoqqalinersiallit siusinaartumillu sulisinnaajunnaarnersiutillit saniatigut sulisarnerminni pisartakkaminnik ilanngaaffigitittarunnaarnissaata kinguneqaataanik Naalakkersuisut misissuinissamik peqquneqarnissaat pillugu Inatsisartut aalajangiiffissaattut siunnersuuta Partii Naleraq sinnerlugu imannak oqaaseqarfingissuarput:

Utoqqalinersiallit siusinaartumillu sulisinnaajunnaarnersiutillit pisinnaatillutik saniatigut sulisarnerminni aningaaarsilaaraangata, ineqarnermut tapiissutinik utoqqalinersiutinillu piiaaffigineqartarerat oqaatigilluaannarlugu iliuusaavoq inunnut taakkununnga kusananngilluinnartoq, sulerusussutsimullu kaammattuutaanngilluinnartoq.

Taamaattumik inatsisartunut ilaasortap Villy Olsvig-ip siunnersuuta tunngaviatigut isumaqatingaarpot, kisianni taamaaliussangaanni misissueqqaartoqarnissaanik piumasaqarneq kinguarsaataannartut isumaqarfingaarpot, tassami misissuisarnerparujussuit ingerlanneqartareerput. Aamma utoqqaat utaqqikatapput.

Tassami 1995-imiit 1997-imut Inunnik Isumaginninnermut Ataatsimiititaliarsuaq sinerissami angalluni ataatsimiititseqattaarlunilu ilaatigut utoqqarnut tunngasut ilanngullugit misissuiffingai.

Tamatuma kingorna aamma pingaartumik utoqqarernut siusinaartumillu sulisinnaajunnaarnersiutilinnut tunngasut pillugit misissuinerit arlallit ingerlanneqartareerput.

Aamma misissuisimanerit kingulliit ilaattut siorna utoqqaat ineqarnerannut pissutsit najungaqariaatsillu pillugit Naalakkersuisut nassuaammik saqqummersitsippot.

Kiisalu naalakkersuisooqatigiinnissamut isumaqatigiissutitsinni aamma tunngavissaqarluareerpungut, tassami anguniagassatut isumaqatigiissutitsinni ilaatigut imannak allaqqasoqarpooq:

“Utoqqaat pillugit politikkimi inuup naleqassusia aallaaviussaaq – tamatumalu siunertaasa ilagaat toqqissisimaneq pitsaassuserlu. Nunatsinni utoqqanngorluni inooqataaneq nuannersuussaaq.

Utoqqaat illoqarnikkut sussassareqatigiinnikkut aningaasaqarniarnikkullu atugarissaartut inuiqatigiinni suleqataajuarnissamut piumassuseqassapput, taamaattumik utoqqaat ajunngitsunik atugaqarnissaat periarfissaqartitaanissaallu naalakkersuisooqatigii sulissutigissavaat.

utoqqalinersiutit pillugit iluarsaaqqittooqarsimanera naalakkersuisoqqatigii naqissuserpaat.

Tunngaviusumik pensionisiat kikkunnut tamanut atuuppoq, aapparisap isertitaanut attuumassuteqanngitsoq eqqunneqareerlunilu.

Utoqqaat utoqqalinersiaminnik ilanngartuiffigineqaratik saniatigut isertitaqarsinnaanissaminnt periarfissaat annertusarneqassapput.

Angerlarsimaffimmi ikiorteqarnermi atuisut akiliisarunnaassapput”.

Aamma siusinaartumik sulisinnaajunnaarnersiutillit pillugit imannak isumaqatigiissuteqareerpugut:

“Inuaqatigiinni pisinnaasut tamarmik sulissallutik inuaqatigiinnut iluaqtaanissaat pingaaruteqarpoq. Innuttaasut killilimmik sulisinnaassusillit siusinaartumik pensionisialittut inissiinnarneqartannginnissaat pisariaqarpoq, akerlianillu uagut taakku piginnaasaat aallaavigalugit, inuaqatigiinni isiginnaartuinnaajunnaartillugit peqataalernissaat aallaavigisariaqarparput”.

Taamaammat utoqqarnut siusinaartumillu sulisinnaajunnaarnersiutillit, saniatigut sulinermikkut isertitaat kisiisa aallaaviginagit, kisiannili aamma uiusup aappaasulluunniit isertitai apeqquataillugit utoqqalinersiutinik siusinaartumillu sulisinnaajunnaarnersiutinik ilanngartuisarneq atorunnaarsinneqartariaqartoq matumuuna piumasareqqipparput

Tassami utoqqalinersiutinik iluarsaaqqinermik taallugu 2015-imi utoqqalinersiutit pillugit inatsit nutarterneqarmat, taamanikkut naalakkersuisuusut suliap saqqummiunneqarnerani ersarilluinnartumik oqaatigaat, utoqqalinersiutit aappaasup isertitai apeqquataatinnagit tunniunneqartalissasut.

Tassami utoqqaat pilluarlutik utoqqalisussaangaluartut ilarparujussui ilungersorlutik ernumallutillu ulluinnarni angummanniapiroorlutik inuuniarsarippuit.

Assersuutgilakka; utoqqaat appariit akuersinermikkut imannak paassisutissiinerat, tamarmik immikkut skat-ti peereerlugu qaammammut 6.850, - kr-inik utoqqalinersiutillit, illumut attartortittakkamut Namminersorlutik Oqartussanik pigineqartumut ukiuni 30-inngulersuni

najungaqarfigisaminnut qaammammut ineqarnermut, kiassarnermut, kallerup inneranut eqqaavinnut, telefonimullu katillugit 10.327,79 kr-inik akiliisarput.

Tassa utoqqaat taakku marluullutik aningaasat sinneruttumininnguit inuussutiginiarsarisarpaat, taammaat nerisassat akikinnerpaat immaqalu peqqinnannginnerit akikinnersiugarisariaqartarlugit aamma atisat tungasigut atortutigullu pitsaanngitsumik sunnerneqartarlutik.

Taamaattumik tupinnaqaaq paasiuminaallunilu utoqqaat ukiorpassuarni inuiqatigiinnut sullissilluareersimallutik aningaasaqarnikkut taama ajortigisumik inisisimalertarnerat.

Taamaattumik matumuuna siunnersuutingaarpot suliat utoqqarnut tunngasut tamaasa ataatsimut katillugit isumaginninnermut peqqissutsimullu ataatsimiitaliami sukumiisumik sulineqassasut ukiamullu aningaasanut inatsisip suliarineqarnissaanut atatillugu utoqqarnut aaqqiissuteqarnissaq anguniarlugu suliap aappassaanneerneqarnissaa ukiamut kinguartinneqassasoq.

Taama oqaaseqarluta suliap aappassaanneerneqannginnerani oqareernitsitut Isumaginninnermut Peqqissutsimullu ataatsimiitaliami suliarilluarneqarnissaa inassutingaarpot.

Anthon Frederiksen